



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

XXVIII La vie de saint Cyrille Alexandrin, Euesque & Conf.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

de saint Chrysostome, comme Cassiodore, liure 10. Histoire Tripar. Socrates liure 6. Theodoret, Lecteur es Collectes liure 2. Sozomene liure 8. Theodoret, liure 5. Nicephore, liure 3. chapitre 2. & Suidas. Plusieurs Papes font mention de S. Jean Chrysostome, come Leon & Gelase, & le 6. & 7. Synode general. S. Augustin au 2. liu. contre Iulien. Damascene en d'aucuns endroits. Sa vie a esté curieusement escripte par Pallade Euesque, George Patriarche d'Alexandrie, & Metaphraste. Et l'Empereur Leon fit vne Oraison en sa louange, en laquelle il discourt de toute sa vie: & Cosme Vestiere la raconte bien plus amplement.

A Constantinople se faisoit iadis la feste de saint Jean surnomme Chrysostome, ou bouche d'or, pour la beauté de son langage, par lequel ioint à l'exemple de pieté & deuotion, il aduanga grandement la Foy Chrestienne, & ayant beaucoup travaillé, mourut en exil. Son sacré corps fut à tel iour du temps, & par le commandement de Theodose le ieune Empereur, transporté à Constantinople, & de là à Rome en la sacristie de l'Eglise saint Pierre. A Cesarée ville de Capadoce saint Barlaam martyr, quoy que rude & grossier, conuert toutesfois de la sapience Chrestienne, surmonta le tyran, & endura constamment le feu pour la Foy. Saint Basile a escript vne fort belle oraison en sa louange. A Sore saint Iulian martyr ayant esté prins durant la persecution d'Antonin sur decapité, parce que tandis qu'on le tourmentoit, le Temple des Idoles tomba par terre. En Afrique deceda saint Anne martyr. En mesmes quartiers les Saints Darius, Rearie & leurs compagnons martyrizés durant la persecution des Vandales. Item, les saints Daisif, Iulien, Vincent, & autres vingt-sept martyrs. A Rome mourut saint Vitalian Pape successeur de saint Eugene, homme de grande sainteté. En la ville du Mans saint Iulian premier Euesque dudit lieu, y enuoyé par saint Pierre pour prescher l'Euangile. Au Monastere de Bobac saint Maur Abbé.

LA VIE DE SAINT CYRILLE Alexandrin, Euesque & Confesseur.

SAINT Cyrille Patriarche d'Alexandrie, estoit fils d'un frere de Theophile, qui fut aussi Patriarche d'Alexandrie, lequel deceda apres auoir gouverné ceste Eglise vingt-sept ans, & à trois iours de là saint Cyrille fut esleu en sa place, comme surpassant tous les autres en vertu, en science, en courage & prudence. Si tost qu'il fut dans ce siege, il commença à lancer les rayons d'une tres-claire lumiere, & faire voir en effect qu'on ne s'estoit point trompé en son election: car la ville d'Alexandrie se trouuant lors infectée d'heretiques, & pollué des Iuifs, S. Cyrille, d'un soin & vigilance incroyable, chassa les heretiques dehors, & fit r'embarrer l'insolence des Iuifs, qui accabloient les Chrestiens de leurs seditions, il reforma aussi les mœurs des Catholiques, s'employa à instruire les ignorans, à consoler les affligez, à secourir les necessiteux, & à endoctriner l'Eglise des admirables liures qu'il composa. Il transporta en Alexandrie vne partie des reliques de saint Marc Euangeliste, & des Saints Cyre & Jean, lesquelles il mit en vne

Eglise que Theophile auoit fait bastir, au lieu d'un fameux Temple des faux dieux, où l'idolatrie auoit long temps regné. Apres la destruction de ce Temple, les diables estoient demeurez tousiours au mesme lieu, lequel ils occupoient & tourmentoient ceux qui en approchoient: mais depuis que saint Cyrille y eut mis ces saintes reliques, leur vertu les chassa, & fit cesser ces terreurs & espouuante mens. Pendant que saint Cyrille gouernoit saintement son Eglise, nostre Seigneur permit qu'une furie infernale eschappast de l'enfer, pour la venir impudemment troubler par sa pestilente heresie, & infecter vne partie de l'Orient. Ce fut Nestorius, homme eloquent, quoy qu'il eut peu de sçauoir, il paroissoit exterieurement le plus honnestes & mortifié du monde, mais il estoit au dedans superbe & arrogant, qui mesprisoit les saints & anciens Docteurs ses maistres. Ce Nestorius pipa tellement par son hypocrisie l'Empereur Theodose le ieune, qu'au seul bruit de tant de belles parties, dont il sembloit estre doué: de simple Prestre d'Antioche qu'il estoit, il le fit Patriarche de Constantinople, & luy donna beaucoup d'autorité & de pouuoir. Nestorius fit paroistre au commencement qu'il estoit fort zelé de la Foy Catholique, pour suiuant les heretiques à cor & à cry, & encourageant l'Empereur de les extirper de la terre: parce qu'en nettoyant l'Eglise de leurs pollutions & erreurs, Dieu l'assisteroit, & il luy promettrait de sa part la victoire des Peres, & contre tous ses ennemis, avec la paix & tranquillité de son Empire. Par ces beaux commencemens Nestorius gagna de plus en plus la volonté de l'Empereur, la bien-vueillance du peuple, & la reputation d'un saint homme, zelé & amy de Dieu: Mais c'estoit un loup desguisé en brebis, & un mercenaire habillé en Pasteur, qui monstroit un grand zele à vouloir arracher les heresies des autres, pour auoir meilleur moyen de plâter la sienne, & semer es cœurs du peuple, come en vne terre bien cultiuee sa peruerse & diabolique doctrine. Il ourrit sa gueule puante, & enseigna que la tres-sacree Vierge Marie, n'estoit ny ne se deuoit appeler Mere de Dieu; parce qu'il disoit qu'encore qu'elle fust vraye Mere de Iesus-Christ, elle n'estoit de Iesus-Christ homme, & nō de Iesus-Christ Dieu, mettant par son sacrilege deux personnes en Iesus-Christ, & peruertissant le tres-saint mystere de l'Incarnation de nostre Seigneur, auquel l'Eglise Catholique confesse que Dieu se fit tellement homme, que la nature diuine s'vnit avec l'humaine dans le ventre immaculé de la Vierge sa Mere: & quoy que les deux natures demeurent distinctes, & sans meslange ny confusion, neantmoins il n'y a qu'une personne qui est homme & Dieu. Or d'autant que cet homme Dieu est vray & naturel fils de Marie, elle est, & se doit appeler Mere de Dieu. Saint Cyrille fortit en campagne contre ce monstre, & de premier abord, n'ayant pas recogneu l'esprit de Nestorius, qui estoit Patriarche de Constantinople, bien voulu de l'Empereur, & homme de grande autorité, il tâcha doucement & modekement à le ranger à la rai-

28. IAN- VIER

28. IAN- VIER



28. son, à le des-abuser, & reduire au droit chemin de la verité Catholique. Il luy escriuit des lettres pleine d'Amour, de grauité & de doctrine, auxquelles l'heretique respondit arrogamment, & avec vn mespris de saint Cyrille, perseuerant en son erreur, & l'ayant tellement dilaté, qu'une petite estincelle alluma vn grand feu, & causa vne incendie deplorable. Pour l'esteindre, saint Cyrille escriuant au Pape Celestin qui presidoit lors en la chaire de saint Pierre, l'aduertissant de la peruerse doctrine de Nestorius, & de la temeraire insolence dont il la diuulguoit, le dommage qu'apporçoit ce mal qui croissoit de iour en iour, afin que le Pape, comme chef vniuersel de l'Eglise, guarist ceste playe, & commandast ce qu'il auroit à faire, se soumettât en tout au souverain Pontife, comme Vicaire de nostre Seigneur en terre: lequel deuement informé de tout ce qui se passoit, apres auoir veu ce que Nestorius escriuit aux Moynes d'Egypte, dont il en auoit peruertie & abusé plusieurs, il assembla vn Concile à Rome, & condamna les erreurs de Nestorius, mandant à saint Cyrille, que si dedans dix iours apres la signification de sa sentence, Nestorius ne se recognoissoit, qu'il le priuast de la charité, de la communion, & participation aux Sacremens de l'Eglise. Par le commandement du Pape Celestin, Cyrille assembla en Alexandrie vn Concile d'Euésques, auquel il fut traité de condamner la doctrine de Nestorius, & d'establiir ce que le Pape auoit ordonné à Rome: ce qui fut fait, & l'ô despescha certains Euésques du mesme Concile, pour aller trouuer Nestorius, & luy notifier ce que le Pape commandoit, le coniuant de ne se laisser transporter à sa passion hors du chemin Royal que les Saints nous ont frayé, & de ne pas croire son propre iugement, plustost que le consentement vniuersel de l'Eglise Catholique, en ce qu'elle auoit tousiours enseigné. Les Euésques y furent, & s'en retournerent sans rien gagner sur ce cœur endurey & obstiné de Nestorius, parce qu'il estoit auégé d'ignorance, enflé d'orgueil, vain, & aheuré sous pretexte de son autorité de Patriarche, flatté du peuple, & enuyré de la faueur de l'Empereur, deuant lequel Nestorius appella, & accusa saint Cyrille, le taxant, & le calomniant d'estre heretique Apollinariste, & broüillant de telle sorte l'affaire, qu'on ne pouuoit executer contre luy la sentence du Pape, d'accusé, se rendât accusateur contre saint Cyrille, suiuant le style ordinaire des heretiques. Mais Cyrille se defendoit brauement, & apres plusieurs disputes que l'obmet, par le commandement du Pape Celestin, & de l'Empereur Theodose, on assembla vn Concile general & œcumenique en la ville d'Ephefe, auquel saint Cyrille presida comme Vicaire du Pape, qui luy donna tout pouuoir, & luy enuoya le manteau. Il s'assembla deux cens Euésques en ce Concile, qui est l'un des quatre que le Pape saint Gregoire disoit qu'il honoroit comme les quatre Euan-giles. Nestorius fut condamné en ceste sainte Assemblée, anathematisé, & priué de son siege, comme heretique, ne l'ayant peu reduire, ny ran-

ger à son deuoir. Il y eut plusieurs contentions & debats en ce Concile, par les ruses & astuces de Nestorius, & de quelques autres heretiques qui le fauorisoient, & par la tyrannie & malice des ministres que l'Empereur auoit enuoyez pour y assister en son nom: lesquels tromperent l'Empereur, l'informans tout au rebours de ce qui se passoit, & s'entremettans des choses Ecclesiastiques plus auant qu'il n'est licite aux hommes seculiers. Nostre Cyrille, & les autres Saints Euésques y furent mal-traittez, & y endurent de grands traualx, iusqu'à ce que l'Empereur sceut la verité d'un bout à l'autre, lequel chastia l'insolence & meschanceté de ses seruiteurs, honora Cyrille, commandant que les Decrets du saint Concile fussent inuolablement gardez, que Nestorius fut banny & la sainte Foy Catholique fauorisée & recogneuë par tout son Empire. Car en verité, le ieune Theodose estoit vn Prince pieux & Catholique qui desiroit de ne point faillir, encore que du commencement il se fust laissé piper de la belle apparence, hypocrisie, & artifices de Nestorius, & de ses propres seruiteurs (qui le fauorisoient à son desceu) & ne se fut montré si ferme comme il deuoit, pour obuier aux dommages que reçoit ordinairement la Religion de la dissimulation & froideur, ou tepidité des Princes. Toutesfois, en fin l'Eglise triompha des erreurs & mensonges de Nestorius, & saint Cyrille, comme braue & vaillant capitaine, demeura maistre du champ, avec vne gloire & loüange incroyable de toute l'Eglise Catholique, & ce qui n'est pas en vne petite recommandation, hay & persecuté de tous les heretiques & amis de Nestorius, lequel fut banny par l'Empereur comme il meritoit, & priué de son siege: de sorte qu'estant accablé d'infinites calamitez, il mourut miserablement, parce que les vers rongerent sa langue sacrilege, qui auoit voulu oster à la Vierge Marie la plus grande gloire qu'elle aye, qui est d'estre Mere de Dieu. Theodore adiouste que tout le reste de son corps fut aussi pourry & corrompu. Nicephore dit d'auantage, que la terre s'ouurit, & l'engloutit dans son enfer, où il fera tourmenté & puny de ses meschancetez, tandis que Dieu fera Dieu. Et afin que l'on cognoisse la bonté de nostre Seigneur qui tire du bien de nos maux; ceste detestable heresie de Nestorius a esté cause de redoubler en l'Eglise Catholique la reuerence, & l'honneur que l'on porte à nostre Dame, que le diable taschoit d'obscureir, & raualer, par le moyé de son ministre, la despoüillant de ceste souveraine & diuine, & en certaine maniere infinie dignité, par laquelle nous croyons qu'elle est vraye Mere de Dieu, l'appellans, & inuouans comme telle, & la supplians de nous ayder & receuoir en sa protection.

Saint Cyrille recogneut bien cét appuy, & sceut par experience qu'il luy auoit fait vn tres-aggreable seruice, de defendre sa dignité & maïesté de Mere de Dieu contre Nestorius: d'autant que son oncle Theophile, qui fut aussi Patriarche d'Alexandrie, ayant eu de grâdes prises avec saint Iean Chryfostome, & signé sa condamnation,

28. JAN-
VIER

tion, par laquelle il fut priuë de son siege, enuoyé en exil, & apres le deceds de saint Iean Chrysostome, ayant soustenu & confirmé son opinion, saint Cyrille croyant que son oncle ne se trompoit aucunement, & que Chrysostome auoit esté iustement depose de son siege, il ne voulut iamais consentir qu'on fist memoire de luy en la Messe, comme l'on auoit accoustumé de faire des autres saints prelatz qui estoient decedez; au contraire Attique patriarche de Constantinople, luy ayant escript & supplié de le faire, recognoissant Chrysostome pour ce qu'il estoit, il l'en refusa tout à plat, & respondit seichement à Attique, luy voulant monstrer que cela estoit contre les Canons, & l'usage de la sainte Eglise, ainsi que rapporte Nicephore & Calixte en son Histoire. Saint Cyrille comme homme se trompa, mais d'autant que son erreur ne prouenoit point d'enuie, de haine, ou de mauuaise volonté, ains d'une faulxe persuasion qu'il s'estoit imprimée de longue main, s'estant fondé sur le iugement & autorité du Patriarche Theophile son oncle, nostre Seigneur ne permit pas qu'un homme si saint & excellent perseuerast en son erreur, duquel il le retira par vne vision merueilleuse, qui fut telle. Il luy fut aduis, que comme il estoit en son Eglise, saint Iean Chrysostome y entra, accompagné de plusieurs Anges, & de la milice celeste en armes, & qu'il en chassoit Cyrille dehors, mais que la tres-sacrée Vierge se trouua là presente pour defendre Cyrille, & pria Chrysostome de le laisser en son Eglise, parce qu'il estoit son Chapelain & deuot seruiteur, qui auoit beaucoup traouillé pour elle à defendre son honneur & sa gloire (tant ceste Dame est benigne, & sçait bien recognoistre ce qui se fait pour son seruice.) par ce moyen Chrysostome laissa Cyrille en son Eglise, lequel fut desabusé, & contrainct d'aduouer les grands merites de Chrysostome, qu'il honora depuis comme un saint, & le fit respecter par toute l'Eglise d'Alexandrie. Saint Cyrille escriuit plusieurs doctes liures, qui sont rapportez par Grenade, Triteme, & Sixte Sienois, & autres Auteurs, desquels on en a fait imprimer la pluspart, le reste qui n'est point encore forty en lumiere, se garde en la Librairie Vaticane. Et Cassiodore met saint Cyrille au nombre des Auteurs qui ont escript sur toute la sainte Escriture: son style est merueilleusement subtil, son iugement bon, sa science rare, fluide en son discours, abondant & elegant en ses paroles, graue en ses sentences, gradement pieux & sincere, qui a illustré & enrichy la sainte Eglise par ses ceuures. Apres qu'il eut bien traouillé pourelle, & gouverné celle d'Alexandrie trente-deux ans, il changea la vie temporelle à l'eternelle le 9. Iuin, l'an de nostre Seigneur, selon le Cardinal Baronius, quatre cens quarante-quatre, auquel iour les Grecs le celebrent en leur Menologe: encore que le Martyrologe Romain & les autres Latins fassent mention de luy le vingthuitiesme de Ianuier.

Triteme appelle saint Cyrille l'ornement, & le bourgeois du mont Carmel, & dit qu'il vescu tres-sainctement, comme un Hermite, aupa-

28. JAN-
VIER

qu'il fust Patriarche, & les peres Carmelites le font estre de leur Ordre en leurs Histoires. C'estoit vn si grand personnage, qu'il n'y a point de Religion qui ne fust bien honorée de l'aduouer: Mais le Cardinal Baronius le nie, & leur contredit par les raisons que le Lecteur curieux pourra voir au sixiesme Tome de ses Annales. Quasi tous les Auteurs de l'Histoire Ecclesiastique escriuent de saint Cyrille: Socrates, Euagre, Nicephore, Calixte, Cedrene, & Glycas: Le Pape Martin premier en parla aussi fort honorablement, Gelase & Leon: Le cinquiesme Synode general, le six & septiesme, le Cardinal Baronius en ses Annotations, & au cinq & sixiesme Tome de ses Annales. L'on peut tirer des Actes du Concile d'Ephefe, plusieurs grandes loüanges de saint Cyrille.

LA VIE DE SAINT IULIEN,
Euesque de Cuence, & Confesseur.



SAINCT Iulien Euesque & patron de Cuence, nasquit en la ville de Burgos, l'an de nostre Seigneur, mil cent vingt-huit: son pere & sa mere furent mariez long-temps sans auoir aucuns enfans. Ils en demandoient à nostre Seigneur (qui les donne, & les oste comme il luy plaist) & faisoient plusieurs deuotions, pour obtenir ceste benediction de sa Majesté: ils furent en fin exaucez, la femme deuint grosse, laquelle pour action de graces, promit à nostre Seigneur de noarrir pour son seruice le fruit dont elle accouchoit. Le pere de saint Iulien eut en dormant vne telle vision: Il luy sembla que sa chambre estoit toute en feu, & que plusieurs bestes noires entroient dedans, & rodoient en hurlant, & fuyant autour de sa chambre, & qu'un petit chien beau, & plus blanc que neige, sortoit de sa femme, qui estinceloit des yeux, & de sa gueule, aboyant apres ces animaux, & qu'apres il s'en retournoit d'où il estoit forty: laquelle vision il communiqua le lendemain au matin à sa femme, non sans estonnement, parce qu'elle croyoit que ceste vision pronostiquoit quelque grande chose de la creature qui estoit en son ventre. Elle accoucha à terme d'un beau fils, lequel sortant du ventre de sa mere, leua son petit bras, & donna la benediction à toute l'assistance, faisant le signe de la Croix, comme font les Euesques quand ils benissent le peuple. Ils demurerent tous bien esmerueillez de ceste nouveauté, & encore plus lors que le iour de son Baptisme ils ouïrent vne tres-douce Musique d'Anges, qui chantoient en l'air, disans: *Auiourd'huy est nay vn enfant qui n'a point son pareil en grace.* Comme on le baptisoit, on vid dessus les fonds vn grand homme qui auoit la mitre en la teste, & la crosse en la main, qui dit: Il doit s'appeller Iulien. par ces prodiges on recogneut incontinent que nostre Seigneur auoit esleu Iulien dès le ventre de sa mere, pour le faire la lumiere, & Pasteur de son Eglise: de maniere que dès son